



ISTRAGA Nakon velike akcije SIPA-e i francuske policije zbog trgovine ljudima

Gazda džeparoša trošio dnevno hiljade maraka na kockanje

U pretresu luksuzne kuće Elvisa Salčinovića u Lukovom Polju kod Zenice pronađeno 12 djece za koje se ne zna ko su im roditelji • Žene i djecu u Francuskoj iskorištavali za džeparenje i prosjačenje

A.Dž. - Dž.Bl. - A.Ka

Tužilaštvo Bosne i Hercegovine otvorilo je istragu protiv članova klana Elvisa Salčinovića, osumnjičenog da je nekoliko godina organizirao trgovinu, iskorištavanje, pa i seksualno zlostavljanje, uglavnom maloljetnih osoba romske nacionalnosti. U velikoj akciji SIPA-e i francuske policije kodnog naziva CD uhapšeno je 15 osoba, među kojima su Elvisovi sinovi Denis i Toni Hamidović, te Luka Hrustić za koje je jučer predložen pritvor.

Grupa djece

Oni se sumnjiče za trgovinu ljudima, većinom žena i djece, čijim su iskorištavanjem, uglavnom za džeparenje i prosjačenje u Francuskoj, pribavili više od dva miliona eura. Kako nam je potvrđeno, dvanaestero djece za koju nije bilo moguće utvrditi porijeklo, roditelje ili staratelje, prekjucher je naden u kući Elvisa Salčinovića u Lukovom Polju u Zenici, a komšije s kojima smo pričali rekly su nam da ih je nekada u dvorištu znalo biti i 50.

U maju 2013. godine francuski sud je na sedam godina zatvora osudio Fehima Hamidovića (62), kojeg su tamošnji mediji nazvali "kraljem pariskog podzemlja", aludirajući na džeparenja koja su za njegov klan obavljana u pariskom metrou.

Tokom cijelog suđenja Hamidović i njegovi advokati su krivicu za sva nedjela prebacivali na Elvisa Hamidovića, koji je u međuvremenu promijenio prezime u Salčinović te se prebacio u Bosnu i Hercegovinu.

Fehim Hamidović je ustvrdio da je Elvis Salčinović svoje radnike nagovorio da svjedoče protiv njega da bi uklonio opasnost od konkurencije. Fehim Hamidović se još nalazi u francuskom zatvoru.

Žrtve torture

Još 19 osoba je procesuirano u istom suđenju, koje je bilo i osnovica za daljnji rad francuskih istražitelja, a u koji su se uključili i SIPA te Tužilaštvo BiH. U tadašnjim iskazima žrtava torture Hamidovići su opisani kao "beskrupulozni tirani, koji su zahtijevali dnevni prihod od 300 eura od svojih prosjaka, koji su prisiljavani na džeparenja i krađe".

- Ukoliko ne donesu 300 eura, maloljetnici su zlostavljani, udarani, čak su im gašene cigarete po tijelu. U različitim periodima za njih je radilo ukupno 500 uglavnom maloljetnih osoba - rečeno je tokom suđenja na kojem su prikazani snimci nekoliko neuspješnih džeparenja mališana, koje su nadzirali Hamidovići.

Hamidovići su na internetu poznati po videoklipu

koji se pripisuje njihovoj porodici, ali nema vjerodostojne potvrde o identitetu aktera sa snimka koji se na YouTubeu nalazi pod nazivom "Samo za dušmani". Na tom videu mlađi muškarac posipa djevojčicu romske nacionalnosti novčanicama koje su složene na stolu, a razbacane po podu. Pretpostavlja se da se na snimku nalaze prave novčanice i da ih ima više od pola miliona eura.

Ne zna jezik

Što se tiče Elvisa Salčinovića, vrijednost njegove imovine u objektima i automobilima u Zenici premašuje milion KM, a istražitelji SIPA-e i MUP-a ZDK su proteklih mjeseci zabilježili da su članovi njegove porodice trošili pojedinačno dnevno i po nekoliko hiljada KM na kockanje, skupocene predmete, iako nijedno od njih nema prijavljeno zanimanje ili zaposlenje.

Advokat Azijada Mujkić iz Zenice, koja zastupa Elvisa Salčinovića i njegovog sina Tonija Hamidovića, jučer nam je samo rekla da ne može u cilju istrage davati bilo kakve izjave.

Denisa Hamidovića, sina Elvisa Salčinovića (39), koji je bio mozak svih aktivnosti ove kriminalne grupe, i Luku Hrustića, također uhapšenog u ovoj akciji, zastupa advokat Senad Dupo-

vac. On je jučer rekao da Denis posljednje tri godine uopće nije bio u Parizu.

- Moj branjenik Denis Hamidović je rođen u Rimu i ima 14 braće i sestara. Stavljaju mu na teret da je svoju braću i sestre u Parizu tjerao na prosjačenje, a uopće nije bio u tom gradu u posljednje tri godine. Kako god, sve će izaći načistac. On govori italijanski i francuski jezik, bosanski ne zna uopće. Francuski inspektori su inicirali ovaj predmet. Nastojali su da naprave organizaciju u smislu Francuska - BiH. Denis mi je pokazao pasoš, nema pečata. Što se tiče mog drugog klijenta Luke, on je bio u Neumu s djevojkom. Stigao je pa je odmah ujutro uhapšen. On nema pojma ni o čemu - rekao je Dupovac.



Page: 17

Reach: 50000

Country: BOSNIA AND HERZEGOVINA

Size: 788 cm2

2 / 3



Salčinović: Organizator trgovine ženama i djecom



Luksuzna kuća, a niko nije zaposlen

Detalj sa snimka pod nazivom "Samo za dušmani"



Djeca i žene zatečeni u Lukovom Polju

Božidar Trišić odmah pušten

Faruk Balijagić, koji zastupa Božidara Božu Trišića, samostalnog referenta u matičnom uredu u Vlasenici, u izvaji za "Dnevni avaz" potvrdio nam je da je njegov klijent još prekjučer, nedugo nakon hapšenja u akciji CD, pušten na slobodu.

- Tužiteljica Diana Kajmaković, koja radi na ovom predmetu, utvrdila je da

Božo nije izdao nijedan dokument za izdavanje državljanstva Romima uhapšenim u Zenici. Zbog toga je i pušten na slobodu - pojasnio je Balijagić. Prema riječima Balijagića, Trišić je uhapšen jer je utvrđeno da je izdao rješenje za dobivanje državljanstva Safetu Hrustiću.

- Trišić je postupio prema zakonu. Hrustiću su roditelji

iz BiH, tako da ima sve uvjete za dobivanje našeg državljanstva. Njega traži italijanska policija zbog izdržavanja 18-godišnje kazne zatvora. Italijanske vlasti zamolile su naše institucije da mu ne izdaju bh. državljanstvo, jer u tom slučaju ne bi mogao biti izručen pravosudnim institucijama u Italiji - rekao je Balijagić.

Page: 17

Reach: 50000


Country: BOSNIA AND HERZEGOVINA

Size: 788 cm2

3 / 3

Fehim Hamidović u zatvoru

Zanimljivo je da su prve informacije o Fehimu Hamidoviću dali italijanski policajci. Naime, on je bio prijavljen kao korisnik socijalne pomoći po koju nije dolazio. Prateći aktivnosti da bi saznali od čega živi ako ne uzima pomoć, italijanski policajci su utvrdili da Hamidović živi raskalašeno i da dnevno u kockarnicama potroši od 1.500 do 2.000 eura te da redovno putuje u Francusku po pazar.



Hamidović: Izdržava kaznu